



Pele Broberg
Inatsisartunut ilaasortaq
Naleraq

Qaammataasiaq atorlugu attaveqaatinik sullissinerit pillugit § 37 naapertorlugu apeqquteqaammut 2024-041-mut akissut

23-02-2024
Sags nr.: 2024 - 4142
ID. nr. 91082799

Asasara Pele Broberg

Inatsisartut suleriaasianni § 37 naapertorlugu Qaammataasiaq atorlugu attaveqaatinik sullissinerit pillugit Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Apeqqut 1 Naalakkersuisut pilersaaruteqarpat Kalaallit Nunaani Tusass A/S aqutiginagu satelitsikkut kiffatuunneqarsinnaanissamut ammaassinissamut?

Akissut: Qaammataasiaq atorlugu attaveqaatinik sullissinerinik Kalaallit Nunaanni ammaassinissaminnut Naalakkersuisut pilersaaruteqanngillat, ammaassisoqaraluarpammi tamanna Kalaallit Nunaanni nalunaarasuartaatitigut attaveqaateqarnermi tamarmi aningaasaqarnermut, pilersuinermillu qulakkeerinermut eqquinerloratarsinnaammat.

Qaammataasiaq atorlugu attaveqaatinik sullissinerinik allanik qinigassaqarnermi naatsorsuutigisinnaavarput, nunanit allanit nalunaarasuartaatinik neqerooruteqartartut aningaasanik isaatitsissutigisinnaasaminnik, aningaasaqarnikkullu imminut akilersinnaatillugu nalunaarasuartaatitigut sullissinerinik taamaalaat neqerooruteqartassassut. Taamaalilluni Tusass A/S isertitatigut annaasaqassaaq, nalunaarasuartaatitigullu attaveqaatinut aningaasartuutigisartagaat ammaassinikkut ikilinatik. Tamanna Tusass A/S-ip Kalaallit Nunaanni nalunaarasuartaatitigut attaveqaatinik aserfallatsaaliuisinnaaneranut, ineriartortitsisinnaanerannullu unamillernartitsissaaq. Tusass A/S-ip, Kalaallit Nunaannilu nalunaarasuartaatinik neqerooruteqartartut allat Kalaallit Nunaanni nalunaarasuartaatitigut sullissinerinik neqerooruteqartarnerat, matumani oqarasuatinik angallattakkanik sullissinerit, qaammataasiaq atorlugu attaveqaatinik neqerooruteqartartut neqeroorutigineq ajugaat ilanngullugit sunnerneqassapput.

Tusass A/S-ip attaveqaatai pigittinnagit nunat allat namminneq soqutigisatik aallaavigalugit nunani allani soqutigisat, nalunaarasuartaatitigut attaveqaat suna sumi atorsinnaassaneripput, qanorlu akigititaqassanersoq, qanorlu sivistigisumik atorsinnaassaneripput aqussavaat. Taamaalilluni pilersuinerinik qulakkeerinermut tamanna eqquissaaq.

Ammaassinikkut Tusass A/S-ip aningaasaqarnera qanoq annertutigisumik sunnerneqarnissaani, pissutsit nalorninartorpasuit apeqqutaassapput. Taamaakkaluortoq ammaassinissamik aalajangiisoqarpat, tamanna qanorluunniit

kingunerluuteqassagaluarpalluunniit kingorna allanngortinneqarsinnaassanngimmat eqqumaffigissallugu pingaaruteqartorujussuuvoq.

Akuersissuteqartitsinikkut internetseqarnissamut, oqarasuaateqarnissamullu innuttaasunut periarfissiissumik illoqarfinnut, nunaqarfinnullu tamanut nalunaarasuartaatitigut attaveqaateqareerpugut. Tusass A/S-imi inuiaqatigiinnut ilaasumi, inuiaqatigiillu ineriartornissaannut akisussaaffimmik tiguisumi nalunaarasuartaatitigut attaveqaatinik ingerlatsigatta tamanna angunikuuarput. Teknologitigut periarfissat nutaat Tusass A/S-ip aamma atorluarniartarpai. Tusass A/S-ip ilaatigut qaammataasiaq atorlugu attaveqaatinik neqooruteqartartut Hisparsat aamma OneWeb isumaqatigiissusiorfiginikuuai, Tusass A/S-ilu Starlink-imik isumaqatigiissusiorniarsaraluni. Attaveqaasersuutitsinnut pisariaqavissunut ilaallutik Tusass A/S-ip sullissineri annaasinnaanngilagut.

Naalakkersuisut Starlink, qaammataasiarlu atorlugu attaveqaatinik neqooruteqartartut allat eqqumaffigaat, teknologilu nutaaq Kalaallit Nunaanni innuttaasunut iluaqutissanngorlugu atorluarnissaa kissaatigalutigu. Taamaattumik qaammataasiaq atorlugu attaveqaatinik neqerooruteqartartut pillugit naleqquttumik oqallissinnaaniassagatta, qaammataasiaq atorlugu attaveqaatinik neqerooruteqartartut pillugit nassuiaasiornissaq aallartitippara. Nassuiaat upernaakkut ataatsimiinnermi Inatsisartunut nassiuuneqassaaq.

Apeqquut 2 Inatsisit suut allanngungassaappat tamanna anguneqassappat?

Akissut: Nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaatigut, Nalunaarasuartaatitigut sullissinerit malittarisassiuuneqarput.

Apeqquut 3. Pisortanut aningaasatigut allaffissornikkullu kingunerisassai suussappat, killeqanngitsumik satelitsikkut kiffartuussineq atuutilissappat, soorlu internet aamma radio?

Akissut: Qaammataasiaq atorlugu attaveqaatinik sullissinernik allanik qinigassaqarnermi pisortanut aningaasaqarnikkut, allaffissornikkullu kingunissai § 37 naapertorlugu apeqqutitut sinaakkutit iluini qulaajarneqarsinnaanngillat, tak. Inatsisartut suleriaasiani § 37-mi imm. 2.

Tassani pingaartumik qaammataasiaq atorlugu attaveqaatinik sullissinernik allanik qinigassaqarnermi piumasaqaataasut, annertussusaalu apeqquummi nassuiaaserneqanngimmata. Taassumap saniatigut pisortanut kingunerisinnaasai paasisinnaaqullugit Kalaallit Nunaanni nalunaarasuartaateqarnermik niuerfiusumut, Kalaallit Nunaannilu nalunaarasuartaatitigut sullissinernut tamarmiusumut kingunissai qulaajarneqartariaqarput.

4. Namminersortunut aningaasatigut allaffissornikkullu kingunerisassai suussappat, killeqanngitsumik satelitsikkut kiffartuussineq atuutilissappat, soorlu internet aamma radio?

Akissut: Qaammataasiaq atorlugu attaveqaatinik sullissinernik allanik qinigassaqarnermi inuussutissarsiutilinnut aningaasaqarnikkut, allaffissornikkullu kingunissai § 37

naapertorlugu apeqqutinut sinaakkutit iluini qulaajarneqarsinnaanngillat, tak. Inatsisartut suleriaasiaani § 37-mi imm. 2.

Tassani pingaartumik qaammataasiaq atorlugu attaveqaatinik sullissinernik allanik qinigassaqaqarnermi piumasaqaataasut, annertussusaalu apeqqummi nassuiaaserneqanngimmata. Taassumap saniatigut Kalaallit Nunaanni namminersorlutik inuussutissarsiutilinnut kingunerisinnaasai paasisinnaaqqullugit Kalaallit Nunaanni nalunaarasuartaateqarnermik niuerfiusumut, Kalaallit Nunaannilu nalunaarasuartaatitigut sullissinernut tamarmiusumut kingunissai qulaajarneqartariaqarput.


5. Innuttaasunut aningaasatigut allaffissornikkullu kingunerisassai suussappat, killeqanngitsumik satelitsikkut kifartuussineq atuutilissappat, soorlu internet aamma radio?

Akissut: Qaammataasiaq atorlugu attaveqaatinik sullissinernik allanik qinigassaqaqarnermi innuttaasunut aningaasaqarnikkut, allaffissornikkullu kingunissai § 37 naapertorlugu apeqqutinut sinaakkutit iluini qulaajarneqarsinnaanngillat, tak. Inatsisartut suleriaasiaani § 37-mi imm. 2.

Tassani pingaartumik qaammataasiaq atorlugu attaveqaatinik sullissinernik allanik qinigassaqaqarnermi piumasaqaataasut, annertussusaalu apeqqummi nassuiaaserneqanngimmata. Taassumap saniatigut Kalaallit Nunaanni innuttaasunut kingunerisinnaasai paasisinnaaqqullugit Kalaallit Nunaanni nalunaarasuartaateqarnermik niuerfiusumut, Kalaallit Nunaannilu nalunaarasuartaatitigut sullissinernut tamarmiusumut kingunissai qulaajarneqartariaqarput.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Hans Peter Poulsen